

Date – 29/04/2025

Time - 18:30 -18:40Hrs

AKASHVANI AIZAWL

HEADLINES (EVENING)

- Lengpui Airport enkawl turin Airport Authority of India chu a inbuatsaih tan.
- MBSE-in High School Leaving Certificate (HSLC) exam result vawiina a tihchhuah ah exam zawng zawng zinga zaa 76.68 an pass.
- Aizawl-Thenzawl-Lunglei ATL Road siamna sum dah phut-a lungawilohna lantir mek Lunglei MZP kawngpui dan ni 2-na vawiin khan lirthei 100 chuang a tangkhang
- National Commission for Scheduled Tribes chuan an Chairperson Pu Antar Singh Arya hovin vawiin khan Autonomous District Council te an tlawh.

<><><>

CM MEETING WITH AAI

Lengpui Airport enkawl turin Airport Authority of India chu a inbuatsaih tan a, AAI hotuten Lengpui Airport tih changtlun nghal ngai zual nia an hriat te leh hma an lak zel dan tur te Chief Minister Pu Lalduhoma hnenah an thlen.

AAI hotute Dr. Sharad Kumar, Member (Operations), Pu M Raja Kishore, Regional Executive Director, NER leh an thawhpuiten Chief Minister Pu Lalduhoma vawiin khan an kawm a. Lengpui Airport - Airport Authority of India kuta hlan chungchang an sawiho a ni.

Chief Minister chuan, tun hma atang tawhin AAI kuta Lengpui Airport enkawl hna hlan tuma hmalakna a awm tawh thin a, anni pawhin ngaihven mahse an beisei angin thil a kal tluang lo va, duhthlan tur dang, Mizoram tana tha tawh tak a lo awm bawh si avangin chung mite nena indawrna te chu an kalpui a ni, a ti a. Tun hnaiah Union Home Minister Pu Amit Shah nen an inkawmnaah AAI nena indawrna thar thawh leh tha an tih avangin tunah hian an indawr leh ta a ni a ti.

Union Home Minister leh Chief Minister ten Lengpui Airport AAI kuta hlan chungchanga inbiakna thar neih an rel hnu hian Commissioner & Secretary to CM, GAD Pu Vanlaldina Fanai chu Delhi ah kalin tun thla ni 16 khan Ministry of Civil Aviation Secretary leh AAI hotute nen meeting an zui nei nghal a. An meeting ruahmanna angin AAI Team te hian Mizoram an rawn tlawh ta a ni.

An inkawmnaah hian Chief Minister hi Adviser to CM Pu TBC Lalvenchhunga, Pu Vanlaldina Fanai leh Mizoram civil aviation wing hotuten an tawiawm a ni.

<><><>

AGRICULTURE MINISTER

Agriculture Minister Pu P.C Vanlalruata'n Mizoram Liquor Prohibition Act 2025 hnuaiah Mizo rilrem zawngin wine siam chhuah leh zawrh kawngah sawrkarin hma a la dawn a ti.

He thu hi wawiina National Symposium and Consultative Workshop on Production of Wine From Grapes and Fruits in Mizoram puala hun buatsaih a hmanpui na ah sawiin Minister chuan Mizoram thei chi hrang hrang hmanga wine siam chhuah kawngah hma an sawn hle a ti a, Mizoram Liquor Prohibition Act 2025 hnuaiah Mizote ril rem zawngin wine siam chhuah leh zawrh kawng ah sawrkarin hma an la dawn a ti a, Mizoram ah grape, sapthei, lakhuihthei leh balhla te chu Mizoram boruak leh ram ah tha tak in a to thin tih sawiin tun aia sawngbawl dan tha zawk an ngaihtuah dawn tih a sawi bawk.

Vawiina hun hmanah hian wine siam lama mithiam ten wine siam dan bakah Mizorama thei chi hrang hrang thar chhuah hmanga wine siam chhuah dan an zir ho a, Wine siam na hmanrua leh wine hmanga tourist hip dan bakah hralhchhuah dan zir ho a ni bawk.

<><><>

HSLC RESULT

Mizoram Board of School Education-in High School Leaving Certificate (HSLC) exam result wawiina a tihchhuah ah exam zawng zawng zinga zaa 76.68 an pass.

Nikum aiin zirlai pass an thahnem zawk a, nikum khan zirlai matric Exam hmachhawn zingah zaa 73.37 an pass a ni.

HSLC exam result chhuakah hian pakhatna chu P.C Lalthakimi, KD High School, Saron Veng Aizawl a ni a, mark 500 ah 479 a hmu a, exam titha zual top 10 ah mi 24 an lang a ni.

Kuminah hian zirlai 18,946 an exam a, zirlai 14527 in an pass-a, HSLC pass thar te hi Distinction-a pass mi 1,343, First Division-a pass mi 3763, Second Division-a pass mi 5785 leh Third Division-a pass 3636 an ni a, Pass zingah hian Second Division-a pass an tam ber a ni. HSLC pass thar te hi hmeichhia 7548 niin mipa 6819 an ni a. Kumin HSLC exam-ah hian zirlai 14367 in hlawhtlinna an chang zo lo a, compartmental chance pek zirlai 60 an awm bawk a ni.

Kumin HSLC exam ah hian Mipa aiin hmeichhia exam hmachhawn an tam zawk a pass zat pawh hmeichhia tam zawkin mipa aia hmeichhe pass 707 in an tam a ni. Deficit school in ti tha ber in za zela 92.62 percent pass an awm a, private candidate pass percentage hniam ber in 46.65 percent an pass a ni. Aizawl District ah pass percentage tam ber in za zela 86.09 percent an pass a, Lawngtlai district chu district mal ah pass percentage hniam ber niin za zela 56.19 percent pass an awm a ni.

MBSE Chairman Pu JH Zoremthanga chuan MBSE pisaah chanchinbumite a kawmna ah kumina compartment 60 awm te chu admission an tlai loh nan exam buatsaih thuai a nih tur thu a sawi a, Compartment exam bakah hian HSLC result complain hun ni 7 chhung hawn a ni dawn a ti a, kumin exam-ah zawhna har zawng tehnaa a zangkhai deuh, LOTS zawhna zaa 60 leh a bak zawng zaa 40 chu tlema har deuh Application leh HOTS atanga siam a nih thu a sawi a, zirnain hma a sawn zel nan HOTS zawhna chu telh tam deuh deuh tura ruahman a nih thu a sawi bawk.

Chief Minister Pu Lalduhoma chuan Zirlai hlawhtling te a lawmpui thu a social media kaltlang in a tarlang a. Zirlai hlawhtlinna chang thar ta te chu an kal zeln turah duhsakna a hlan a. Pu Lalduhoma chuan zirlai naupangte hlawhtlinna an chan theihna tura thawktu Education Minister leh Education department-a thawktute, zirtirtute leh exam felfai taka buatsaih tu MBSE chungah te lawmthu a sawi. Zirlai napuang hlawhtling zo ta lo te chu hnual lo tura chah in, Mihring nun kawng chu hlawhtlinna hlira a khah loh bakah hlawhchham chang pawh a beidawng lo va bei tute chu an hlawhtlin thin thu a tarlang a ni.

<><><>

MIZORAM FLORIST FAIR

Ni 4 awh tur Florist Fair, Mizoram Florist Association buatsaih chu Horticulture Board Secretary Pi Ramdinlianin a hawng.

Florist Fair hi Aijal Club park ah neih niin a duh apiang tan chhim theih a hawn a ni a, Pangpar chi hrang hrang bakah, pangpar khawina pot, leitha leh pangpar enkawl na bungrua chi hrang hrang lei theih a chhawp chhuah a ni a.

Mizoram Florists' Association hi 16th November, 1997 khan din a ni a, Branch 27 Mizoram hmun hrang hrang ah an awm tawhbawk. Florist fair ah hian pangpar chingtu mi 20 vel in pho chhuak in, an pangpar chin te mipui lei theih in an phochhuak a ni.

Florist Association hian Lengpui Airport, Rajiv Gandhi Stadium ah te pangpar khawi a an in hlawh thin thu Laltei Ramthar Veng a pangpar khawi tu in a sawi a, an pangpar pho chhuah te chu a chi phai atangin chah thin in anlo kui triak a, an zuar thin tih a sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

ATL ROAD STIR

Aizawl-Thenzawl-Lunglei ATL Road siamna sum dah phut-a lungawilohna lantir mek Lunglei MZP kawng dan ni hnihna vawiin khan Hrangchawkawn, Pukpui leh Lawngtlai lamah lirthei thahnem tak a tangkhang mek a, tunah hian pawl hrang hrang 22 vel in MZP hmalakna hi an thlawp thu an chhuah tawh a ni.

Kan corr report lo ngaihthla ang.

Nimin khan Pukpui daiah Lunglei atanga lut leh chhuak tur te lirthei eng chi pawh an dang a, tunah hian bungraw phur leh LVC 20 vel an tang. Hetihlai hian tukin dar 7:00 atang khan Hrangchalkawn paltlanga lut leh chhuak tur lirthei an dang ve leh a, lirthei 100 chuang dan an ni a. Motor an dan zingah hian bungraw phur motor lian an tam hle a, khualzin phur motor leh mimal motor te pawh an awm ve nual. Motor an dan tam ber hi Siaha leh Lawngtlai Dist bakah Lunglei Dist chhung ami te pawh an awm ve nawk tho a ni.

Thanghmingliana Akashvani news Lunglei

Kan corr sawi danin, kawngpui dan duty zingah hian Commercial Vehicle Owner te leh ZDU mi leh sa te pawh an awm a. Central Young Lai Assn (CYLA) ten thlawpna an chhuah hnuin vawiin chawhma lam khan Sub. Hqtrs. YMA Lunglei Emergency Meeting chuan ATL Road siam na tur sum pawh pen dah let leh ngiata MZP hmalakna chu Mizoram Chhim lam mipui aw a ni tih hria a, a hma thei ang bera tih hlawhtlin sak turin sorkar a ngen bawk a ni.

<><><>

NCST

National Commission for Scheduled Tribes chuan an Chairperson Pu Antar Singh Arya hovin vawiin khan Autonomous District Council te an tlawh a ,

National Commission for Scheduled Tribes Members Pu Nirupam Chakma, Dr. Asha Lakra leh Pu Jatothu Hussain te chuan Chakma Autonomous District Council hmunpui Chawngte-ah Yuva Samvat _(CADC Foundation Day)_ an hmanpui hnuah, chawhnu lamah Mara Autonomous Dist Council hmunpui Siaha an tlawh leh a MADC, CEM Bunglow, Siaha-ah an mahni lawmna hun buatsaih a ni.

Pu Antar Singh Arya chuan National Commission for Scheduled Tribes te hi tun ang hian a huhovin an zin ngai lo tih sawiin, Autonomous District Council hnathawhte an hmuhin an lawm hle a ti a. National Commission for Scheduled Tribes a a awm hnuah an tih hmasak ber chu Tribal-te hmasawnna tur sawi puiin India President Pi Droupadi Murmu an hmu hmasa ber a, ani pawhin Tribal-te hmasawnna a ngai pawimawh tak zet a ti a, amah chu Madhya Pradesh Tribal ve tho anih thu sawiin, Tribal-te hmasawnna a ngaih pawimawh thu leh hnamzia leh nihnite humhim a vawng nung zel turin a chah.

National Commission for Scheduled Tribes Chairperson hian Lai Autonomous District Council leh Mara Autonomous District Council-te hotute kawmin, LADC in Lai hnam hmasawnna tur Memorandum a siam chu Pu David Zothantluanga P&DO, LADC chuan a hlan a ni.

<><><>